

Fraccion MEP cu accion di firma contra Rijkswet

Segun Fraccion AVP Rijkswet HOFA a bin caba den bestuurlijk akkoord firma pa Gabinete Wever-Croes

Manera ta conoci e topico di Ley di Reino (Rijkswet) ta uno cu ta keda presenta den comunidad, como tambe entre politiconan. Fraccion di MEP a expresa den diferente ocasion nan disgusto y nan posicion contra di e concepto di e Ley di Reino nobo cu Gabinete AVP-FUTURO a entrega na Consejo di Minister di Reino. En conexion cu esaki, partido MEP ta organisando un accion di firma pa asina ciudadanonan por firma contra e Ley di Reino.

Durante in conferencia di prensa recién, lider di fraccion di MEP parlamentario Evelyn Wever-Croes, a elabora riba e accion di firma aki y e motibo tras di dje. El a splica cu gobierno actual, tras di lomba di Parlamento, di pueblo, y di gremionan tambe, y sin informa ningun hende a entrega un ley na Hulanda cu nan a yama un Consensus Rijkswet, un ley di consensus. Esaki, manera ta conoci, a sucede dia 29 di augustus, mientras cu fraccion di MEP y PPA tabatin siete luna wardando pa un reunion publico pa haya mas informacion riba e topico di Ley di Reino.

Parlamentario Wever-Croes a splica cu gobierno a yama e ley un consensus Rijkswet, pero nan no tin consensus pasobra consensus no por bin di un gobierno, pero mester



por ser proba cu tin consensus di parlamento, pero parlamento no tabata sa di nada.

“Cu esaki e gobierno di AVP y FUTURO a comete un error garafal gañando Hulanda cu nan tin consensus siendo cu nan no tin esaki. Si e fraccionnan di AVP y FUTURO a bisa nan cu nan ta di acuerdo no ta consensus, mester tin un debate den Parlamento di Aruba cu ta muestra cu tin un consensus,” el a remarca.

El a sigui splica cu e forma con e gobierno actual a cana cu e ley aki ta muestra caba cu e ley no por drenta na vigor. Ademá, el a agrega, e ley tin hopi riesgo y desbentaha pa Aruba y p’esey nan tin un accion di firma. “E no ta un accion di MEP, e no ta un accion geel, e ta un accion cu color di bandera di Aruba pasobra e ta un accion pa nos por protehe Aruba, pa nos defende Aruba,” el a enfatisa.

Pa loke ta e accion di firma, parlamentario Wever-Croes a indica cu nan ta pidi nomber, adres, e-mail y e motibo pa kico e persona ta contra Rijkswet y e firma. El a splica cu e accion di firma aki ta ser acopla na e consulta riba internet. Na momento cu Hulanda ta bay cambia un ley e ta consulta cu pueblo a traves di internet y pueblo por duna su opinion.

El a remarca cu lamentablemente na Aruba tin hende cu no tin internet y pa e motibo ey nan ta yuda a traves di e accion aki pa asina nan por percura cu su firma e ciudadano tambe ta participa den e consulta riba internet. E accion di firma aki lo dura te cu fin di e siman aki pa asina logra acumula mas tanto firma cu ta posibel pa nan por muestra tanto gobierno di Aruba como tambe di Hulanda cu e pueblo di Aruba no ta aproba e forma con nan a pasa tras di lomba di parlamento y di

henter pueblo, manipulando cu un consensus Rijkswet sin cu tin consensus.

Parlamentario Wever-Croes a subraya cu e Ley di Reino cu e gobierno aki a entrega no ta bon pa Aruba, pero ya caba a entrega esaki na Consejo di Minister di Reino sin cu a consulta cu parlamento prome. El a splica cu gobierno a indica cu ta trata di un concepto cu ainda por bin Parlamento di Aruba, pero segun Wever-Croes Parlamento di Aruba no por debati riba esaki mas ni por cambia nada mas y no ta esun cu ta bay vota riba dje. Ta parlamento di Hulanda ta vota riba dje y eynan ta caminda por bin cambio y pa bin cambio mester di mayoria di e mas di 150 parlamentario Hulandes.

Fraccion di AVP a reacciona a traves di videonan publica riba nan pagina oficial di Facebook.

Lider di fraccion Parlamentario Jennifer Arends-Reyes a splica cu gobernacion ta continuacion local ta nifica cu cada biaha cu pais Aruba a firma na Hulanda den pasado den gobernacion anterior, awe tin consecuencia pa Aruba. “Awe Aruba tin cu para pa ‘afspraak is afspraak’ y esey kiermen cu no por core pa responsabilidadnan cu a ser tuma door di awe parlamentario Wever-Croes kende a firma den calidad di prome minister pa Aruba,” el a bisa.

Parlamentario Arends-Reyes a indica cu tabatin diferente momento cu Aruba por a scoge di keda cu LAft, e ley local cu ta regla e normanan, pero toch a opta pa bay otro caminda y bin cu e Rijkswet hibrido cu despues a bira a un bestuurlijk akkoord cu ta contene e cuadronan principal cu a “mara Aruba”.

“Pa locual ta trata e Rijkswet cu tin riba mesa, cu yama HOFA, esaki ta bin caba den e bestuurlijk akkoord. Den cual ta indica cu esaki ta e caminda cu e gobierno anterior a mara nos na dje. Mesun partido cu tabata den gobierno cu a mara pais Aruba na un Rijkswet, awe ta contra y ta buscando bo firma. Esaki no ta corecto, informa bo mes,” el a finalisa.

Parlamentario di fraccion di AVP Otami Thomasia tambe di su banda a trece dilanti den un video cu como un politico nobo e ta “hopi desapunta con irresponsabel oposicion ta hibando politica.”

El a indica cu e mesun prome minister, actual parlamentario Wever-Croes, cu a bay Hulanda pa firma un bestuurlijk akkoord pa cuminsa e proceso di e Rijkswet aki, ta e mesun persona cu ta buscando firma di pueblo.

Segun parlamentario Thomasia e ex prome minister a instrui tres profesional pa cuminsa e proceso, cual ta e mesun profesionalnan cu Gabinete AVP-FUTURO a sigui traha cune pa trece e concepto di e Rijkswet aki dilanti. Peor awor, segun e parlamentario, e ex prome minister den calidad di parlamentario no ta bon mas.

“Ora di papia den parlamento semper ta trece dilanti cu mester respeta e profesionalnan. Pero p’ami e ta zona’mi cu ora ta cumbini nan nos ta respeta nos profesionalnan. Esey no por ta, nos mester ta consistente ora nos tin un norma y balor di algo of un persona,” el a indica.

Parlamentario Thomasia a expresa cu fraccion di AVP ta lamenta cu mal informacion di oposicion ta trece preocupacion y emocionnan a base di narativanan falso. “Awor a keda pa parlamento analisa e obligacion cu ex prome minister a mara nos na dje,” el a finalisa.

